

TIMOTEO

Jmo₅ Pa₄ si₂ a₂chein₃ ne₄ Timoteo

1 ¹ Jniá₂ Pa₄, líng₅ dsa₂ i₂chen₄ quián₅ Te₁gui'₅₄ Jesucristo, cheng₅₄ con'₂ nē₅ 'nio₃ Diú₄ bá₄, con'₂ lē₅ jág₁ ca₂cuē₃ Diú₄ jniog₄ a₂le₃chong₂ të₂le₃ quian'₅₄ Cristo Jesús. ² Jmo₅ jniá₂ si₂ la₂ ne'₅₄ 'ne₂ jón₃ quiáng₃ Timoteo, 'nio₃ jniá₂ jui₁chang'₂ bá₄ nēi₂ dsí₅ Diú₄, jui₁jme₂gu'₅₄ bá₄, jui₁chang'₂ bá₄ 'ei₅ tei₄, jui₁jmo₅₄ Diú₄ Jmei₂ jniog₄ quian'₅₄ Te₁gui'₅₄ Jesucristo quián₂.

'A₂ lia'₂ dsi₂ten₅₄ jáng'₃ dsa₂ jág₁ dsau₅ të₂le₃ quió'₅ Cristo

³ Dsau'₂ dsi₃ co₂tan₅₄ bá₄ 'ne₂ jë₄ chi₂leng'₅₄ Diú₄ lia'₂ 'uë₂-jmi₂. Jaun₂ lë₃ cué₅ jniá₂ ti₁'mag'₄ jme₂tí₁ ta₁ ne₅₄ a₂ma₂le₁jé₃ a₂qui₂dsi₂jñi₅ të₂dsi₃ jui₁lia'₂ ca₂jmo₃ dsa₂ can'₅₄ quiáng₃ ma₂líg'₂. ⁴ Ca₂le₃jé₃ jmi₂g₄ bá₄ dsau'₂ dsi₃ lia'₂ con'₂ ca₂'o'₅₄ le₂jaun₂, jaun₂ jme₁'nio₃ i₁jing₁₂ táng₃ 'ne₂ ia₁jaun₂ jmo₅₄ 'io'₂. ⁵ Dsau'₂ bá₄ dsi₃, ia₁ 'éng'₂ të₃dsón'₂. Chi₁'io'₄ Loida quian'₅₄ chog'₂ Eunice, ján₃ bá₄ le₂nē₅ ca₂rë₃'éin₂ le₂'uig₅₄. Jaun₂ të₃dsón'₂ lín₂ jniá₂ ján₃ bá₄ le₂jaun₂ 'én'₂ 'ne₂.

⁶ Jaun₂ lë₃ juá'₅ jniá₂, cuē'₅₄ bí₂ ca₂le₃jé₃ a₂ma₂cuē₃ Diú₄ të₂'au'₂, a₂lë₅ lia'₂ lë₅ si₂ të₂'au'₂ a₂ca₂nig'₂ lia'₂ con'₂ jme₁ca₂co₃ jniá₂ gu₃ ne₄ quiáng'₂.

⁷ Ia₁ on₃jua'₅₄ jme₂dsí₂ i₂gó'₅ ma₂cuin₃ Diú₄ jniog₄. Jme₂dsí₂ 'éi₂ bá₄ ma₂cuin₃ i₂jmo₃ a₂nio₃ tiá₂ dsi₅ jniog₄, i₂jmo₃ a₂jme₁'nió₄ jniog₄ rin'₅₄, i₂jmo₃ a₂jme₂'uán₄ dsi₅ guio₅₄. ⁸ Tsá₃ lë₁jmo₂ gueng'₅₄ ja₁jang'₅₄ jág₁ dsau₅ o₄quió'₄ Te₁gui'₅₄ quián₂, on₃ guë'₂ jmo₂ gueng'₅₄ o₄quió₃ jniá₂ ia₁ 'eng₅₄ né'₃ 'má₃ o₄quió'₄ 'éi₂. Të₂le₃ guen₅₄ bá₄ ján₃ jë₂ jmi₁uig₅ a₂já₅ o₄quió'₄ jág₁ dse₃, con'₂ lë₅ bí₂ a₂cuē₅ Diú₄. ⁹ i₂ca₂lió₂ jniog₄ ton'₂ ca₂të₃ ia₁jaun₂ le₃chong₂ jniog₄ jñi₅. On₃jua'₅₄ ia₁ cha₂ 'e₂ dse₃ ma₂jmo₁ jniog₄, ia₁ le₂nē₅ ca₂lë₃ dsí₅ 'niog₅ ca₂jmo₃ 'ua₁ dsí₅ ca₂rë₃'nio₃ jniog₄ të₂le₃ 'uig₅₄ o₄quió'₄ Cristo Jesús. Ia₁ le₂jaun₂ jme₁ma₂'nio₃ bá₄ Diú₄ jniog₄ ca₂le₂jñiá₅ lia'₂ con'₂ tsá₃ mi₂güig₃ ma₂jmo₃. ¹⁰ Diú₄ ma₂ca₂jme₃jnia₂₃ léi₄ ja₁con₂ dsa₂ mi₂güig₃, a₂'nio₃, jme₁ca₂chein₃ Jesucristo i₂lió₂ quián₂ jniog₄, co₂dsia₅ ca₂'éin₂ bí₂ a₂'io₅ 'mú₃; ton'₂ ca₂jme₃jnia₂₃ të₂le₃ quian'₅₄ jág₁ dse₃, 'a₂ lia'₂ le₃chan₂ dsa₂ co₂tan₅₄.

¹¹ 'Uig₅₄ jaun₂ ca₂rë₃'ín₁ jniá₂, ia₁jaun₂ qui₂i₁'é₃ jág₁ dse₃ la₂, a₂leng₂ jan₂ të₅ i₂chen₄ quiáin₅. ¹² 'Uig₅₄ jaun₂ bá₄ a₂nag₅₄ ca₂le₃jé₃ ne₅₄ uig₅ la₂. La₁ tsá₃ o₂guí'₃ jéin₅ jniá₂, ia₁ guion₅₄ bá₄ 'ein₂ të₂le₃ quió'₅ ma₂ca₂'ag₃

^{a11} A₂lin₅₄ chog₅₄ si₂ juá'₂ ján₃: “a₂jme₁tin₂₃ dsi₂nau₂.”

caun₂ dsi₃, 'éng₂ bá₄ a₂io₅ 'éi₂ bí₂ a₂jmo₃ 'í₁ a₂le₃tei₅₄ jniá₂ ta₁
a₂ma₂ca₂dsia₃ gu₃,^b ca₂lia'₂ ca₂té₂ jmig₄ jaun₂.

¹³ Caun₂ jmo₄ bá₄ jui₁lia'₂ ma₂ca₂jme₁ting₂₃ 'ne₂. Jui₁chang'₂ bá₄
'éng'₂, jme₁'nió₄ ríng'₂ le₃quió'₅ Cristo Jesús. ¹⁴ Quian'₅₄ bí₂ quió'₅
Jme₂dsí₂ quián₅ Diú₄ i₂jio₅ të₂dsi₅ jniog₄, jmo₄ 'í₁ a₂ma₂dsia₃ Diú₄ gog'₂.

¹⁵ Ma₂ñi'₅₄ bá₄, ca₂le₃jín₃ bá₄ dsa₂ chan₂ 'uë₃ Asia ma₂ca₂téi₂ bá₄ jniá₂,
i₂lin₅₄ 'éi₂ Figelo quian'₅₄ Hermógenes né₃. ¹⁶ Jui₁dsia₅₄ bá₄ Te₁gui'₅₄ ñéi₂
dsí₅ ca₂le₃jín₃ dsa₂ dsi₂néi₂ quió'₅ Onesíforo, ia₁ 'lióng₂ ráun₂ bá₄
ma₂guain₂₃ o₃jag₅₄ ca₂jmo₃ ca₂rë₃güig'₂ jme₂dsí₂ quió₃. On₃jua'₅₄ a₂jaun₂
gui'₅₄ ja₃jag₅₄ ia₁ a₂'eng₅₄ né₃ 'má₃. ¹⁷ Të₂le₃ ca₂o₃'niog'₂ bá₄ jniá₂
jme₁guain₃ Roma. Ca₂lia'₂ ca₂dsáu'₂ bá₄ ca₂jmo₃. ¹⁸ Jui₁dsia₅₄ bá₄
Te₁gui'₅₄ ñéi₂ dsí₅ ja₁coin₂ jë₁ma₂té₂ jmig₄ jaun₂. Dsá₂ bá₄ 'au'₂ 'ne₂,
ca₂jme₃'o₅₄ 'ñio₅ lin₃ jniog₄ lia'₂ con'₂ jme₁tio'₅₄ juig₂ Efeso.

Jan₂ 'lióg₂ dsen₃ quián₅ Jesucristo

2 ¹ La₁ 'ne₂ né₃ jón₃ quiáng₃, quen'₂ bí₂ nau₂ tiá₂ ia₁ a₂'ua₁ dsí₅ Diú₄
ca₂jmo₃ të₂le₃ quian'₅₄ Cristo Jesús. ² Ca₂le₃jé₃ a₂ma₂nei'₂ ma₂juá'₃
jniá₂ të₃jín₄ juin₅ dsa₂ i₂ca₂té₂ ne₄, jág₁ jaun₂ dsia₄ gu₂ dsa₂ i₂rë₂ti'₅₄
i₂qui'₅₄ jmig₄ jme₃tin₅ i₂sián'₂ táng₃. ³ 'Niag'₂ guë'₂ né₃, tiang'₃ jmo₄
ñag'₅₄ uig₅ o₄quió'₄ Jesucristo, jmo₄ bá₄ jui₁lia'₂ ja₁jmo₅ jan₂ 'lióg₂ tió'₃
dsí₅ jui₁lia'₂ jme₁'ein₅₄ ne₄ 'nei₂. ⁴ 'I₁jan₂ 'lióg₂ i₂jme₂ti₃ dse₃ ta₁ a₂chéin'₅
jua'₅₄ lé₂ le₃qui₂tián₂ tsi₃nei₃ jág₁ a₂ca₂tín₂ dsa₂ lë₁dsa₂, ia₁jaun₂ bá₄ lé₂
jme₃ti₃ con'₂ 'ñio₂ dsí₅ juig₅₄. ⁵ Ján₃ bá₄ le₂jaun₂ jui₁lia'₂ dsa₂ i₂co₅, tsá₃
a₁jaun₂ jua'₅₄ a₂lí'₂ 'e₂ lí'₂ në₁jua'₂ tsá₃ ca₂quín'₃ bí₂ co₃ con'₂ dsi₂ten₅₄
quí'₅ 'éi'₃. ⁶ Ján₃ bá₄ le₂jaun₂ jui₁lia'₂ dsa₂ i₂jmo₅ ta₁ ja₁nau₂, ca₂tín₂ bá₄
gue₃ le₂'uig₅₄ con'₂ ca₂tín₂ jë₁ma₂rau₂. ⁷ 'Nio'₂ 'au'₂ a₂juá'₅ jniá₂ la₂.
Te₁gui'₅₄ bá₄ jmo₃ le₃ñíg'₂ ca₂le₃jé₃.

⁸ Dsau'₂ 'au'₂ jmo₄, tsá₃ jui₁dsi₂'én₂ 'au'₂ Te₁gui'₅₄ Jesucristo i₂ca₂jen'₅₄
táng₃ jin₄ 'lag₄, i₂jme₁lín₄ tsi₁jon₂ David; a₂la₂ bá₄ jág₁ dse₃ a₂lión₂ dsa₂,
a₂'é₅ jniá₂. ⁹ 'Uig₅₄ jág₁ dse₃ la₂ bá₄, jmo₅ jniá₂ tió'₅ dsi₃ ñag₅₄ uig₅.
Rë₂'ñeg'₅₄ quian'₅₄ ñí₁ cadena co₂jmo₃g'₂ dsa₂ jui₁lia'₂ ja₁jmá'₂ dsa₂ jan₂
dsa₂ i₂rë₂cán'₄ dso₄ juë'₂. La₁ jág₁ dse₃ quió'₅ Diú₄ né₃, tsá₃ rë₂'ñe'₅₄
quian'₅₄ ñí₁ cadena. ¹⁰ Jaun₂ bá₄ lë₃, o₄quió'₄ dsa₂ i₂ma₂quión'₂ Diú₄
jmo₂₃ tió'₅ dsi₃ ca₂le₃jé₃, ia₁jaun₂ bá₄ tín'₄ 'éi₂ ján₃ le₃quió'₅ Cristo Jesús
ja₁lë₄ co₂tág₅ co₂'né'₅ co₂tan₅₄.

¹¹ Të₃dsón'₂ bá₄ dsau₅ a₂la₂:

Në₁jua'₂ ca₂dsau₃ jniog₄ quian'₅₄ Jesucristo,
ján₃ bá₄ le₂jaun₂ le₃chong₂ jniog₄ quian'₅₄.

¹² Në₁jua'₂ ca₂náu₂ jniog₄ tiá₂,^c
ján₃ bá₄ le₂jaun₂ jme₁gon₂ jniog₄ quian'₅₄.

^b12o₃, "a₂jmo₃ 'í₁ a₂ma₂ca₂dsia₃ jniá₂ gu₂ 'éi₂."

^c12o₃, "Në₁jua'₂ ñag₄ jniog₄ uig₅."

Ně₁jua'₂ tsá₃ tión₅ jniog₄ a₂cuin₅,
 ján₃ bá₄ le₂jaun₂ tsá₃ 'ag₃ jniog₄ ján₃.
¹³ Ně₁jua'₂ tsá₃ ca₂rě₃tei₅₄ jniog₄,
 la₁ le₃ti'₅₄ bá₄ 'ñiog₅,
 ia₁ caun₂ jág₁ ma₂juá'₂ Diú₄
 tsá₃ a₁jaun₂ lé₂ jua'₅₄ tsá₃ jme₃ti₃.

Jui₁lia'₂ dsa₂ i₂jme₂ti₃ dse₃ ta₁ ne₄ Diú₄

¹⁴ A₂la₂ chei'₅₄ dsa₂ i₂jme₂tíng'₁: dsá₂ dsí₅ jui₁jmo₁₂ o₄quió'₄ Te₁gui'₅₄
 a₂tsá₃ tsiin₃ quian'₅₄ dsa₂, jág₁ a₂tsá₃ ta₁ tí₄, ia₁ ně₁jua'₂ tsin₅ dsa₂ ně₃,
 tsá₃ 'e₂ a₂dse₃ jmo₂₃, jñia'₅₄ con'₂ jmo₂₃ a₂gon₃ a₂'én₂ dsa₂ i₂nag₅ bá₄.
¹⁵ Jmo₄ dsen₅₄ 'au'₂ a₂jme₁jñiag'₅ ne₄ Diú₄ a₂léi₄ ma₂ca₂tiang'₃ táu₂
 a₂ma₂i₂ñíg'₂, a₂lín'₅ jan₂ dsa₂ i₂jmo₅ ta₁, i₂tsá₃ 'e₂ jua'₅₄ cha₂ a₂jéin'₂
 o₂guí'₃, i₂jme₂tag₅ rě₂ jág₁ tí₅. ¹⁶ Tsá₃ lě₁cuín₅ jmig₄ jua'₅₄ a₂dsiá'₁ jág₁
 quió'₅ mi₂güí'₃ a₂tsá₃ ta₁ tí₄. Ia₁ dsa₂ i₂co₂jmo₅ le₂jaun₂ caun₂
 qui₂dsi₃lén₂ ne₄ jui₅ jě₄ cosa 'lig'₅₄. ¹⁷ Cosa a₂jme₂tag₂₃ qui₂dsi₂jón₃ lia'₂
 jě₁qui₂dsi₂jón₃ caun₂ dso₄ a₂jmo₅ a₂dsa₂ ni₁ñi₁ dsa₂. Le₂ně₅ bá₄ ca₂lě₃
 quian'₅₄ Himeneo quian'₅₄ Fileto ně₃. ¹⁸ Ma₂i₃lén₂ tě₂le₃ cau₅ ja₁tsá₃ tí₅
 jág₁, a₂qui₂jme₂tiin₂₃ dsa₂ a₂juá'₂ ma₂ca₂tě₂ bá₄ jmig₄ a₂jen'₅₄ 'lag₄, jmo₂₃
 a₂qui₂nió₅ i₂lín₅₄ 'a₂ lia'₂ 'éin₂. ¹⁹ La₁ Diú₄ ma₂chi'₃ caun₂ cho'₅₄ 'uig₅₄
 a₂chí'₅ tiá₂ co₂tan₅₄. A₂jaun₂ jáng'₅ léi₄ a₂juá'₂: “I₂cuín₅ bá₄ Te₁gui'₅₄
 i₂lín₅ dsa₂ quiáin₅”,^d jaun₂ ně₃: “Ca₂le₃jín₃ i₂quian₅ lia'₂ chen₂ Cristo^e
 ca₂tíin₂ jmo₃ cau₅ ca₂le₃jě₃ ja₁jmo₅ dsa₂ cosa 'lig'₅₄.”
²⁰ Jui₁lia'₂ caun₂ dsi₂néi₂ pa₁, on₃jua'₅₄ jmá'₃ ca₂ne₅₄ cosa jlá'₁ a₂lě₅
 quian'₅₄ cu₄nióg₄ quian'₅₄ cu₄tio₂ tio'₅₄, ia₁ ján₃ bá₄ tio'₅₄ cosa a₂lě₅
 quian'₅₄ ni₁'ma₂, a₂lě₅ quian'₅₄ ti₁gua'₅₄ ján₃. A₂lín₅₄ a₂lě₅ 'í₁ a₂jmó'₂ dsa₂
 ta₁ jmá'₃ lia'₂ ne₄ a₂jlá'₁; a₂lín₅₄ guě'₂ qui₂jmó'₂ dsa₂ ta₁ lia'₂ 'ei₅ ne₅₄
 cosa.^f ²¹ Ně₁jua'₂ ca₂jñiá'₃ 'ne₂ ca₂le₃jě₃ ne₅₄ jui₅ 'lig'₅₄, a₂jmó'₂ jmá'₃
 ca₂ne₅₄ cosa dse₃, jaun₂ guě'₄ lén'₂ lia'₂ lě₅ caun₂ ni₁uing₅ jlá'₁ a₂lě₅ 'í₁,
 jaun₂ guě'₄ tén'₃ ta₁ cáun₂ Juig'₂ 'ne₂ jmó'₂ ca₂ne₅₄ ta₁ dse₃ quió'₅.
²² Cuín₅₄ 'ne₂ ca₂le₃jě₃ ne₅₄ cosa 'lig'₅₄ a₂ja₂ dsí₅ dsa₂ jmo₃ tě₁lia'₂
 mei'₂. Quian₂ caun₂ jui₅ co₂dsau₅ a₂'éng'₂, a₂'nióg'₃ ríng'₂, a₂'ei₅ tei₄ 'au'₂
 quian'₅₄ ca₂le₃jín₃ dsa₂ i₂ma₂le₁jě₃ tě₂dsí₅, i₂jme₂juin'₂ Te₁gui'₅₄. ²³ Tsá₃
 lě₁tón'₂ jui₅ 'e₂ jág₁ tsá₃ ta₁ tí₄ a₂tsi₂jín₅ dsa₂ i₂tsá₃ ma₂'en₅₄ dsí₅. Ia₁
 ma₂ñi'₅₄, a₂jñia'₅₄ dsio₅ mi'₅₄ bá₄ a₂jaun₂. ²⁴ Jan₂ dsa₂ i₂jme₂ti₃ ta₁ ne₄
 Te₁gui'₅₄ tsá₃ ca₂tíin₂ tsi₃nei₃ jě₄ mi'₅₄, tě₂le₃ 'nió'₅ jme₃dsein₃ bá₄
 quian'₅₄ ca₂le₃jín₃. 'Nió'₅ lén₂ jan₂ dsa₂ i₂qui'₅₄ jmig₄ jme₃tiin₂₃ dsa₂,
 juin'₂ dsí₅, ²⁵ jmo₃ 'ua₁ dsí₅ jě₁chein'₃ jui₅ rě₂ jui₁lia'₂ dsa₂ i₂nau₂ quen₅,
 con'₂ tsá₃ ñó₅ ně₁jua'₂ ca₂cuě₃ Diú₄ jmig₄ a₂le₃tsín₃ dsí₅ dsa₂ 'éi₂, ia₁jaun₂

^d19 Números 16:5.

^e19 o₃, “Ca₂le₃jín₃ i₂mi₅ ne₄ Te₁gui'₅₄.”

^f20 'Nio'₂ ja₁ton₅ Romanos 9:21.

le₂në₅ le₃cuí'₅ jág₁ tí₅; ²⁶ ia₁jaun₂ lióin₂ 'uín₃ tsi₁cág'₅ quió'₅ i₂së₃dsen₃
i₂ca₂jo₃ ia₁jaun₂ jmo₃ a₂'ñio₂ dsí₅ 'éi₂.

'A₂ lia'₂ niog₅ lén₂ dsa₂ jmi₄g₄ jë₁ca₂tó'₂

3 ¹ 'Nió'₅ le₃ñi'₅₄ 'ne₂ ján₃, jë₁ma₂ja₂quián₃ jmi₄g₄ jë₁ca₂tó'₂, 'ñio₅ lin₃
le₃gau₂, quian₅ ta₁ lé₂. ² Jmi₄g₄ jë₁ca₂tó'₂ le₃chan₂ dsa₂ i₂jñia'₅₄
'nioi₃ guioin₅₄ bá₄ quian'₅₄ cú₁; le₃chan₂ dsa₂ i₂jñia'₅₄ jme₃jlán'₁ jmo₃
róin₂ guioin₅₄; le₃chan₂ dsa₂ i₂lë₁të₂'o'₂ të₂'oin'₂ riin'₅₄; le₃chan₂ dsa₂
i₂tsá₃ ma₃jme₃gan₃ Diú₄, i₂tsá₃ ma₃jme₃gan₃ chog₅₄-jmei₂ né₃. Le₃chan₂
dsa₂ i₂tsá₃ 'e₂ ti₁'mag'₄ cha₂ ja₁coin₂, on₃ guë'₂ ma₃jme₃gó'₃ juá'₅ quió'₅
Diú₄. ³ Le₃chan₂ dsa₂ i₂tsá₃ 'nio₃ rin'₅₄, i₂tsá₃ ma₃'e₂ ñéi₂ dsí₅ dsa₂
mi₂güí₃g₃ rin'₅₄; le₃chan₂ dsa₂ i₂tsá₃ ma₃jme₃ti₃ 'e₂ jág₁ li'₅₄ quian'₅₄
riin'₅₄; le₃chan₂ dsa₂ të₂jág₁ i₂lë₁qui₃'ni₃ rin'₅₄; le₃chan₂ dsa₂ i₂tsá₃ ñi₅,
tsá₃ tiin₂ 'a₂ lia'₂ jme₃'uán₂ dsí₅; le₃chan₂ dsa₂ i₂lén₂ jui₁lia'₂ já'₂ tsau₂
dsí₅; le₃chan₂ dsa₂ i₂le₃'io'₅₄ ca₂le₃jé₃ cosa dse₃. ⁴ Le₃chan₂ dsa₂ i₂qui₃jín'₂
rin'₅₄; le₃chan₂ dsa₂ i₂tsá₃ 'en₅₄ dsí₅ jmo₃ të₂le₃ dséi₂ në₁'e₂ caun₂ cosa
jmo₃ jui₁le₅₄ bá₄ 'e₂ ca₂lë₃; 'ñio₅ cain'₅₄ 'ñio₅ ñi₅ jmo₃; le₃chan₂ dsa₂
i₂'no'₂ jmá'₃ jui₅ ja₁le₃chain₂ o₂'ñio₃ o₂jñia₃ dsí₅ bá₄ 'nió'₄ jme₁'niai'₂
Diú₄. ⁵ Le₃chan₂ dsa₂ i₂jmo₃ a₂ñí₄ lë₃ cuiin₂₃ Diú₄, la₁ le₃léi₄ bá₄ 'a₂ lia'₂
të₁i₃noi₅₄ le₃chain₂, tsá₃ 'e₂ bí₂ quió'₅ Diú₄ cha₂ ja₁coin₂.

Co₂dsia₅ jñiag'₃ cau₅, tsá₃ lë₁'ú₅ quian'₅₄ dsa₂ i₂le₂'éi₂. ⁶ Jë₄ quió'₅ dsa₂
le₂'éi₂, chan₂ i₂lin₅₄ i₂qui₂dsi₂ton'₅₄ tsi₁'né₅, qui₂jme₂gain₂₃ 'io₅₄ 'uan₅₄
i₂qui₂rë₂cán'₄ dsáu₁ 'ñio₅ lin₃, i₂ma₂lë₅ dsí₅ jmo₃ ca₂le₃jé₃ gué₄ cosa
'lig'₅₄. ⁷ Co₂tan₅₄ bá₄ jmo₂₃ lia'₂ jmo₅ dsa₂ i₂ñí₄ lë₃ 'nio₃ le₃tin₂ jág₁, la₁
tsá₃ a₁jaun₂ qui'₅₄ jmi₄g₄ le₃cuí'₅ jág₁ tí₅ dsón'₂. ⁸ Jui₁lia'₂ ca₂jmo₃ on₃
dsa₂ 'lin'₅₄ i₂jme₁chen₂ Janes quian'₅₄ Jambres ca₂rë₃'ñiai₅₄ Moisés, ján₃
bá₄ le₂jaun₂ 'io'₅₄ dsa₂ 'éi₂ jág₁ dsau₅ dsón'₂. Dsa₂ i₂le₂'éi₂ né₃ co₂dsia₅
ma₂ñí'₂ të₂le₃ jen₅ bá₄ dsí₅, 'uig₅₄ jaun₂ tsá₃ ma₂'e₂ tió'₅ a₂le₃ñí'₂ dse₃ dsí₅
jui₁lia'₂ ja₁ñí'₂ dsí₅ dsa₂ i₂'én₂. ⁹ La₁ tsá₃ jua'₅₄ ja₁uín₂ dsi₁lén₂, ia₁
ca₂le₃jín₃ bá₄ dsa₂ le₃cuig₅ a₂lín₅ dsa₂ co₄, jui₁lia'₂ ca₂i₃ñí'₂ le₃on₃
i₂ca₂jme₃'ñia₅₄ Moisés.

Jág₁ jë₁ca₂tó'₂ a₂ca₂cuë₃ gué₄ Pa₄ ca₂tsí'₃ Timoteo

¹⁰ La₁ 'ne₂ né₃ ma₂ca₂rë₃tíng'₃ bá₄ dse₃ jë₂ lia'₂ lé₅ juá'₅ a₂ca₂jme₁tag₅
jniá₂; ma₂ñi'₅₄ 'a₂ lia'₂ líng₅, chang₂ ma₂guio₃; ma₂cuíng'₂ bá₄ 'e₂ ta₁
ma₂guio₃ jniá₂ jmo₂₃; 'éng'₂ bá₄ ján₃ 'a₂ lia'₂ 'én₂ jniá₂; jme₂juíng'₁ bá₄
'au'₂ jui₁lia'₂ ma₂ca₂jme₁juín'₂ jniá₂ dsí₃; jme₂'nióg'₃ bá₄ ríng'₂ jui₁lia'₂
ma₂jmo₃ jniá₂; tiang'₃ bá₄ ján₃ jui₁lia'₂ ca₂tió₃ jniá₂. ¹¹ Ma₂qui₂ma₂'ein₃
dsa₂, ma₂qui₂ma₂ñag₅₄ uig₅, jui₁lia'₂ ca₂i₃ñí'₂ juig₂ ciudad Antioquía,
juig₂ Iconio quian'₅₄ juig₂ Listra né₃. Qui₂ca₂co₃'ein₃ dsa₂, la₁ ne₄
ca₂le₃jé₃ a₂në₅, ca₂lió₂ bá₄ Te₁gui'₅₄. ¹² Jaun₂ a₂dsón'₂ bá₄ jaun₂,
ca₂le₃jín₃ i₂'nio₃ le₃chan₂ lé₅ 'í₁ quián₅ Cristo Jesús, tion₅₄ le₂jaun₂
dsi₃ñí₂ uig₅ co₂'ein₃ dsa₂. ¹³ La₁ dsa₂ 'lin'₅₄ né₃ quiaín'₅₄ ca₂le₃jín₃ dsa₂

i₂qui₂jme₂gau₅, tsá₃ ma₂'e₂ dse₃ jua'₅₄ le₃chain₂, ia₁ caun₂ le₃'liin'₅₄ bá₄, qui₂jme₃gau₂₃, qui₂rë₂gain₂ guioin₅₄ në₃.

¹⁴La₁ 'ne₂ në₃, nau₂ tiá₂ a₂ma₂ca₂rë₃tíng'₃, caun₂ bá₄ 'ei₅ 'au'₂ jág₁ a₂ma₂ca₂rë₃'éng'₂. 'Niag'₂ bá₄ ñi'₅₄ 'ein₂ ca₂jme₃tag₅. ¹⁵Lia'₂ con'₂ bíng'₅₄ bá₄ ma₂ñe'₃ cuíng'₂ Si₂ jñi₅quíó'₅ Diú₄. Si₂ në₅ bá₄ a₂jio₃quíáng'₂, a₂tíng'₄ të₂le₃ quian'₅₄ Cristo Jesús ia₁ 'éng'₂. ¹⁶Ca₂le₃jé₃ bá₄ Si₂ quió'₅ Diú₄ ca₂lë₃ të₂le₃ quian'₅₄ Jme₂dsí₂ quiáin₅, a₂tí₅ ta₁ jme₃tag₅ a₂dse₃, të₂jí₂, chein'₂ dsa₂ caun₂ jui₅ rë₂, jme₃tag₅ 'a₂ lia'₂ i₂nio₄ dsa₂ jui₅ co₂dsau₅, ¹⁷ia₁jaun₂ lén₂ dsa₂ quián₅ Diú₄ jan₂ dsa₂ ma₂ron₂, rë₂ rë₂qui₂rë₂'an₂ dsí₅, rë₂'ñia₅ ca₂le₃jé₃ a₂'nió'₅ quió'₅ jaun₂ jmo₃ ca₂le₃jé₃ ne₅₄ a₂dse₃.

4 ¹Jág₅ bá₄ Diú₄ quian'₅₄ Te₁gui'₅₄ Jesucristo në₃ i₂lé₅ jág₁ jñi₅quíó'₂ ja₃goin₂, i₂qui₃dsi₅ 'éi'₃ ne₄ quió'₅ i₂chan₂ lia'₂ i₂ma₂dsan₃ në₃. Jaun₂ lé₃ chi₂quian₅₄ jniá₂ jmig₄ 'ne₂: ²Ë₃ jág₁ dse₃. Ma₂rë₂jáng'₁ 'nio'₂ jui₅ 'a₂ lia'₂ jme₁tíng'₂ dsa₂ jme₁cuin₅ jmig₄ o₃ tsá₃ cuin₅ jmig₄ 'e₂. Jmó'₂ jme₁'uang'₅₄ dsí₅ dsa₂, të₂jén₃ dsa₂, tioen'₂ jág₁ dse₃, o₁líg'₂ jmig₄ jua'₅₄ a₂jmó'₂ a₂tsá₃ jme₁juin'₂ 'au'₂ quiaín'₅₄ jë₁jme₂tín'₂. ³Ia₁ já₅ jmig₄ a₂tsá₃ ma₃jmo₃ dsa₂ tió'₅ dsí₅ quian'₅₄ juá'₅ dse₃. Të₂le₃ lia'₂ con'₂ lé₅ dsí₅ guioin₅₄ qui₃'nai'₂ juin₅ lin₃ të₅ i₂jme₃tag₅ jmá'₃ a₂'ín₅ dsí₅ guioin₅₄ nag₃ bá₄. ⁴Cau₅ bá₄ jéin'₃ táng₃ jui₁lia'₂ ja₁jme₂tag₅ dsa₂ jág₁ tí₅ dsón'₂. Cang₂ jaun₂ në₃, tóin'₃ jui₅ dsi₃lén₂ nag₃ ca₂lia'₂ 'ei₅ ne₄ jág₁ cuento ga₂ a₂'én₂ dsa₂. ⁵La₁ 'ne₂ në₃, 'en₅₄ 'au'₂ jmo₄, tiang'₃ jmo₄ ñag'₅₄ uig₅. Caun₂ qui₂'é₃ bá₄ jág₁ dse₃ a₂lión₂ dsa₂. Jme₁ti₁ dse₃ ta₁ quiáng'₂.

⁶Jniá₂ në₃, ca₂té₂ jmig₄ jë₁o₃'íng₅ mi₂güí₃ la₂, ia₁ në₃ gué₄ jñag'₃ dsa₂ jui₁lia'₂ ja₁jñi'₂ dsa₂ já'₂ i₂jén'₂ dsa₂ ne₄ Diú₄. ⁷Ma₂ca₂quín'₃ jniá₂ bí₂, ma₂jmo₃ a₂dse₃ jui₁lia'₂ ja₁jmo₅ jan₂ 'lióg₂ ne₄ 'nei₂; ma₂ca₂ñi₃ jniá₂ lia'₂ con'₂ lé₅ jui₅ quió'₅ Te₁gui'₅₄, ca₂dsióg₃ jniá₂ të₂ jë₁ca₂tó'₂ jui₅; ma₂ca₂jmá'₃ tiá₂ a₂'éng₂. ⁸Në₃ gué₄ në₃ ma₂lé₅ co₂jñia₅₄ ja₁le₃chang₃ dse₃, co₂'nió'₄ caun₂ corona a₂cuë₃ Te₁gui'₅₄ jmig₄ jaun₂. Ia₁ Te₁gui'₅₄ 'éi₂ bá₄ i₂qui₃dsi₅ 'éi'₃ co₂rë₂ jmig₄ jaun₂, on₃jua'₅₄ a₂cuë₃ jmá'₃ jan₂ jniá₂ corona; a₂cuë'₃ ca₂le₃jín₃ i₂le₁jñiog₅ 'ñio₂ dsí₅ ca₂lia'₂ ca₂té₂ jmig₄ jaun₂ a₂guain'₂ táng₃.

Cué'₅ jág₁ riin'₅₄ con'₂ ca₂tín₂ guioin₅₄

⁹Jmo₄ dsen₅₄ 'au'₂ a₂i₁jag'₄ jniá₂ ñi'₅₄ ta₁ la₂. ¹⁰Ia₁ i₂chen₂ Demas ma₂téi₂ bá₄ 'uig₅₄ ia₁ 'ñio₅ lin₃ gué₄ 'ín₅ dsí₅ cosa a₂cha₂ mi₂güí₃ la₂, jaun₂ ma₂ñó₅ jui₅ juig₂ Tesalónica. I₂chen₂ Crescente guë'₂ në₃, ma₂ñó₅ jui₅ 'uë₃ Galacia; Tito guë'₂ në₃ ma₂ñó₅ jui₅ Dalmacia. ¹¹Jñia'₅₄ lia'₂ jan₂ Lucas bá₄ i₂quian'₅₄ gué₄ jniá₂ ja₁lá₃. 'Nia'₂ Marcos ia₁jaun₂ jain'₅₄ ñe'₅₄ quiaín'₅₄, ia₁ téin₅ ta₁ jme₃ti₃. ¹²Tíquico guë'₂ në₃ ca₂tsín₂ jui₅ juig₂ Efeso. ¹³Jë₁ma₂té₂ rë₁ñe'₅₄, quian₂ co₂nio₄ tsi₁'mi'₂ dsiog₂ quió₃ a₂ca₂dsia₃ juig₂ Troas ja₁quió'₄ Carpo. Ján₃ bá₄ le₂jaun₂ quian₂ si₂ rë₂bin₅ quió₃. La₁ 'ñio₅ gué₄ dsen₅₄ 'nió'₅ ni₁lo₁ já'₂ a₂lé₅ tsi₁mi₂si₂.

¹⁴ Alejandro i₂lín₅ tē₅ñí₁ 'ñio₅ lín₃ tsá₃ 'e₂ dse₃ ma₂jmóg'₂. Te₁gui'₅₄ bá₄ qui₃ quió'₅ lia'₂ con'₂ lē₅ a₂ma₂jmo₃. ¹⁵ 'Í₁ jmo₄ 'ne₂ ján₃ ia₁jaun₂ tsá₃ jo₅₄, ia₁ 'ñio₅ lín₃ ma₂nau₂ quein₅ a₂'io'₅₄ jág₁ dse₃ quián₂.

¹⁶ Le₂'uig₅₄ con'₂ jme₁ca₂chei'₃ dsa₂ ne₄ dsi₂tan₅₄ jē₁ca₂cáun₃ dsa₂ le₂'uig₅₄ jág₁ dsau₅ quió₃, 'i₁jan₂ tsá₃ 'ein₂ ca₂jme₃quiong'₅₄, ca₂téi₂ ca₂le₃jín₃. Tsá₃ jui₁quion₂ bá₄ Diú₄ 'í₁ quió'₅ ia₁ ca₂jmóg'₂ le₂jaun₂. ¹⁷ La₁ 'ñiog₅ bá₄ Te₁gui'₅₄ ca₂jme₃quiong'₅₄ ca₂cuē₃ bí₂ ia₁jaun₂ tē₂le₃ quian'₅₄ jniá₂ ca₂rē₃ti₃ ca₂jme₁ting₂₃ dsi₂nau₂, ca₂lia'₂ rē₂'ña₅ jág₁ dse₃. Jaun₂ le₂nē₅ bá₄ ca₂lió₂ Te₁gui'₅₄ jniá₂ mi₂'o₄ dsi₂'ia'₂. ¹⁸ La₁ Te₁gui'₅₄ bá₄ caun₂ lió₂ gué₄ ia₁jaun₂ tsá₃ dsi₃ñíg₂ ca₂le₃jé₃ cosa 'lig'₅₄, jaun₂ jniá₂ i₂lé₅ 'í₁ quiáin₅, tē₂ guei'₅₄ i₂juíg₃ ja₁goin₂. iJui₁jme₂juag'₂ bá₄ dsa₂ co₂tan₅₄! iA₂méi₃!

'Ág'₅ jág₁ jē₁ca₂tó'₂, cuag₂₃ Diú₄ né₃

¹⁹ Dsian'₄ jniá₂ jág₁ cuíng₅ Diú₄ Priscila⁸ quian'₅₄ Aquila né₃, quian'₅₄ ca₂le₃jín₃ dsa₂ dsi₂néi₂ quió'₅ Onesíforo né₃. ²⁰ Juig₂ Corinto bá₄ ca₂jñia₃ Erasto. I₂chen₂ Trófimo guē₂ ca₂tē₁'ñiá₄ dso'₅₄ jme₁o₃'íng₃ juig₂ Mileto.

²¹ Quen'₂ bí₂ ñe'₅₄ ñi'₅₄ ta₁ né₃ a₂tē₅₄ jein₂ güíg₂. Eubulo quiaín'₅₄ Pudente, Lino quiaín'₅₄ Claudia né₃ quiaín'₅₄ ca₂le₃jín₃ rin'₅₄ jniog₄ dsiáin'₂ jág₁ ne'₅₄ a₂cuíin₂₃ Diú₄ 'ne₂.

²² Jui₁'en₅₄ bá₄ Te₁gui'₅₄ Jesucristo ja₁con₂ jme₂dsí₂ quiáng'₂; jui₁jme₂gu'₅₄ bá₄ Diú₄ 'nia'₂.

Co₂nē₅.

⁸19 griego: Prisca.